

Memori KORPORAT

UiTM DALAM SEJARAH

INSTITUT TEKNOLOGI MARA CAWANGAN SARAWAK

Kampus ITM Cawangan Sarawak merupakan kampus cawangan yang kedua ditubuhkan selepas Yayasan Sabah-ITM Sabah iaitu pada 1 Julai 1973 dengan jumlah pelajar seramai 94 orang. Pada ketika itu kampus cawangan masih lagi ditempatkan di kampus sementara di Batu Lintang sebelum berpindah ke Semenggok pada bulan Julai 1987, Samariang pada bulan Julai 1989 dan seterusnya berpindah ke kampus tetap di Samarahan pada tahun 1997 yang berkeluasan 360 ekar. Penubuhan ITM Sarawak mendapat sokongan padu dan kerjasama erat dari Kerajaan Negeri dan juga Yayasan Sarawak.

Objektif utama penubuhan kampus cawangan Sarawak ini adalah untuk membawa peluang pelajaran sedekat yang mungkin kepada penduduk-penduduk di Sarawak dan menyediakan tenaga kerja dalam bidang separa professional & professional dari kalangan bumiputera Sarawak. Mengikut perancangan, semua kursus yang ditawarkan ITM akan dijalankan di kampus cawangan ini. Walaubagaimanapun, masih terdapat juga kursus-kursus tertentu yang terpaksa ditawarkan di kampus induk Shah Alam. Selaras dengan perkembangan pesat kampus ini, mulai bulan Julai 1987, pelajar-pelajar di ITM Cawangan Sarawak boleh menamatkan pengajian mereka tanpa perlu berpindah ke kampus induk Shah Alam seperti tahun-tahun sebelumnya.

Pada tahun 2002, UiTM Cawangan Sarawak telah membuka satu lagi kampus di Mukah. Antara program yang mula diperkenalkan adalah Pra-Diploma (Perdagangan). Pada masa penubuhan, para pelajar ditempatkan di lot-lot kedai yang disewa untuk dijadikan asrama, bangunan pentadbiran, perpustakaan dan bilik kuliah serta 14 lot kedai terpaksa di tambah sewa pada tahun 2007 di Boulevard Setia Raja bagi menampung pertambahan pelajar. Pada ketika itu, dua program telah diperkenalkan di Kampus Mukah iaitu Diploma Pengajian Perniagaan dan juga Diploma Pengurusan Perladangan. Pada 9 April 2011, satu majlis pecah tanah yang dirasmikan oleh Ketua Menteri Sarawak pada ketika itu, Pehin Sri Abdul Taib Mahmud untuk membina bangunan tetap UiTM di Mukah dan mula beroperasi sepenuhnya pada tahun 2015. Kampus yang dibina ini mampu menampung sehingga 2,000 pelajar.


Pada bulan Oktober 2010, satu lagi kampus telah dibina seluas 88 ekar (36 hektar) iaitu Kampus Samarahan 2 yang siap sepenuhnya pada 1 Oktober 2013 bagi menampung pertambahan pelajar sehingga 4,000 orang. Kampus ini adalah sebagai tambahan kepada kampus utama di bawah perancangan Kampus PFI (Private Funding Initiative) UiTM.



Bangunan ITM Sementara di Batu Lintang sekitar tahun 1970-an.



Bangunan ITM Sementara di Semenggok sekitar tahun 1987.



Bangunan ITM di Samariang sekitar tahun 1990-an.

Sumber :

1. *ITM Warisan Bangsa*
2. *Melakari Peristiwa Kampus-Kampus Cawangan*
3. *Kampus-Kampus Cawangan Baharu UiTM: Mengubah Destini Anak Bangsa*
4. *Laman Sesawang, UiTM Cawangan Sarawak*